

XEFATURA DO ESTADO

8865 *LEI 5/2001, do 8 de maio, sobre concesión dun suplemento de crédito, por importe de 4.866.309.925 pesetas, para o pagamento de retribucións, establecidas en diversas sentencias firmes, dictadas a favor das persoas encargadas do ensino da relixión católica nos colexios públicos. («BOE» 111, do 9-5-2001.)*

JUAN CARLOS I

REI DE ESPAÑA

Saiban tódolos que a viren e a entederen que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

O 20 de maio de 1993 foi subscrito en Madrid un convenio entre o Ministerio de Educación e Ciencia, o de Xustiza e a Conferencia Episcopal Española, sobre o réxime económico das persoas encargadas do ensino da relixión católica nos centros públicos de educación primaria.

Na cláusula 3.^a do devandito convenio sinalábase que o importe económico de cada hora de relixión tería o mesmo valor que a retribución real por hora de clase de calquera materia impartida por un profesor interino do mesmo nivel.

Non obstante, na cláusula 5.^a do citado convenio establecíase que a equiparación económica á retribución por hora de clase impartida polos profesores interinos do nivel correspondente debía alcanzarse en cinco exercicios orzamentarios, se ben a citada cláusula non se cumpriu nos seus propios termos.

Isto orixinou que diverso profesorado de relixión de centros de ensino primario promovese recursos ante os tribunais de xustiza, que deron lugar a sentencias estimatorias ó seu favor.

Actualmente están pendentes de execución 20 sentencias que afectan a 887 profesores e que, segundo valoración efectuada pola Dirección Xeral de Persoal e Servizos do Ministerio de Educación, Cultura e Deporte, supoñen retribucións e xuros pendentes de pagamento por un importe de 4.866.309.925 pesetas.

Para atende-las obrigas derivadas de sentencias xudiciais firmes que recoñecen o dereito dos recorrentes a percibir retribucións e xuros pendentes, tramítase este suplemento de crédito.

Artigo 1. *Concesión dun suplemento de crédito.*

Concédesse un suplemento de crédito, por un importe de 4.866.309.925 pesetas, ó orzamento en vigor da sección 18 «Ministerio de Educación, Cultura e Deporte», servizo 04 «Dirección Xeral de Programación Económica, Persoal e Servizos», programa 422A «Educación infantil e primaria», capítulo 1 «Gastos de persoal», artigo 13 «Laborais», concepto 131 «Laboral eventual».

Artigo 2. *Financiamento do suplemento de crédito.*

O suplemento de crédito a que se refire o artigo anterior financiarase con débeda pública, de acordo co establecido no artigo 101 do texto refundido da Lei xeral orzamentaria, aprobado polo Real decreto lexislativo 1091/1988, do 23 de setembro.

Disposición derradeira única. *Entrada en vigor.*

Esta lei entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumpran e fagan cumprir esta lei.

Madrid, 8 de maio de 2001.

JUAN CARLOS R.

O presidente do Goberno,
JOSÉ MARÍA AZNAR LÓPEZ

8866 *LEI 6/2001, do 8 de maio, de modificación do Real decreto lexislativo 1302/1986, do 28 de xuño, de avaliación de impacto ambiental. («BOE» 111, do 9-5-2001.)*

JUAN CARLOS I

REI DE ESPAÑA

Saiban tódolos que a viren e a entederen que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

Un dos principios básicos que debe informar toda política ambiental é o da prevención. Pola dita razón, os sucesivos programas das Comunidades Europeas sobre o ambiente viñeron insistindo en que a mellor maneira de actuar nesta materia é tratar de evitar, con anterioridade á súa produción, a contaminación ou os danos ecolóxicos, máis que combater posteriormente os seus efectos.

Neste sentido, a Directiva 85/337/CEE, do Consello, do 27 de xuño, relativa á avaliación das repercusións de determinados proxectos públicos e privados sobre o ambiente, representou o instrumento xurídico que mellor resposta daba a esta necesidade, integrando a avaliación de impacto ambiental na programación e execución dos proxectos dos sectores económicos de maior importancia, en consonancia co que establece o actual artigo 6 do Tratado Constitutivo da Comunidade Europea, segundo o cal as esixencias da protección do ambiente deben incluírse na definición e na realización das demais políticas e accións da Comunidade, co obxecto de fomentar un desenvolvemento sustentable.

A citada directiva comunitaria considera, entre outros aspectos, que os efectos dun proxecto sobre o ambiente deben avaliarse para protexe-la saúde humana, contribuír mediante un mellor contorno á calidade de vida, velar polo mantemento da diversidade de especies e conserva-la capacidade de reprodución do sistema como recurso fundamental da vida.

A incorporación da Directiva 85/337/CEE ó Dereito interno estatal efectuouse mediante norma con rango de lei, ó aprobarse o Real decreto lexislativo 1302/1986, do 28 de xuño, de avaliación de impacto ambiental, os preceptos do cal teñen o carácter de lexislación básica estatal, a teor do disposto no artigo 149.1.23.^a da Constitución, sendo obxecto de desenvolvemento polo Real decreto 1131/1988, do 30 de setembro, que aprobou o Regulamento para a execución do real decreto lexislativo citado.

Pola súa parte, as comunidades autónomas, de acordo coas competencias que lles recoñecen os respectivos estatutos de autonomía, desenvolveron a normativa básica de avaliación de impacto ambiental, ben mediante leis formais ou ben mediante disposicións regulamen-